

02/04/2001

Uniten buka kampus di bandar Muadzam Shah

ROMPIN, Ahad - Universiti Tenaga Nasional (Uniten) milik penuh Tenaga Nasional Berhad (TNB) akan membuka kampus cawangannya di Bandar Muadzam Shah di sini tahun ini.

Universiti itu akan menawarkan kursus Diploma dan Ijazah dalam bidang pengurusan perniagaan, ekonomi dan akaun.

Pengerusi TNB, Datuk Jamaluddin Mohd Jarjis berkata, kampus baru ini hanya menawarkan kursus berkaitan pengurusan perniagaan, manakala kampus utama di Bangi kira-kira 25 kilometer di selatan Kuala Lumpur menawarkan kursus kejuruteraan.

"Pada peringkat permulaan, pengambilan penuntut seramai 300 orang akan dilakukan pada Jun ini dan akan bertambah 3,000 orang dalam lima tahun.

"Kita amat berterima kasih dengan Kerajaan Pusat dan kerajaan negeri yang bersetuju dengan cadangan TNB untuk mewujudkan kampus itu, terutama di sini dengan menggunakan segala prasarana sedia ada," katanya pada sidang akhbar di sini.

Beliau yang juga Ahli Parlimen Rompin, berkata sejak Lembaga Kemajuan Pahang Tenggara (Dara) ditutup banyak infrastruktur yang ada terbiar dan TNB akan mengambil alih sepenuhnya bangunan Dara itu.

"Bangunan itu akan dijadikan kampus cawangan Uniten, selain menggunakan bangunan jabatan dan agensi kerajaan lain yang kosong. Ini bermakna TNB tidak perlu mengeluarkan belanja yang besar bagi membina bangunan baru "Dengan penggunaan bangunan sedia ada itu, bagi fasa pertama TNB hanya membelanja RM50 juta bagi melakukan pengubahsuaian untuk bilik kuliah dan asrama," katanya.

Katanya, Perdana Menteri, Datuk Seri Dr Mahathir Mohamad dijangka melancarkan kampus cawangan itu menerusi sidang video pada 11 Mei ini.

"Kita berhasrat menjadikan bandar Muadzam Shah sebagai bandar universiti, supaya semua kemudahan dan asrama diletakkan di bandar itu. Kita tidak berhajat mengasingkan penuntut dengan masyarakat di situ," katanya.

"Jika kita belanja RM100 juta untuk mewujudkan kampus itu di bandar besar, sudah tentu kesannya tidak begitu baik, tetapi jika berbuat demikian di luar bandar seperti Muadzam Shah, sudah tentu ia memberi manfaat kepada penduduk serta pembangunan di situ," katanya.

(END)